

0222 2026 Неделя сыропустная. Воспоминание Адамова изгнания. Прощеное воскресенье. Глас 4-й. Обретение мощей свт. Тихона, патриарха Московского и всея Руси

НА ВЕЛИКОЙ ВЕЧЕРНЕ

«Блажен муж» – кафизма вся.

НА «ГОСПОДИ, ВОЗЗВАХ» СТИХИРЫ НА 10:

воскресные, глас 4-й:

1. Стих: Изведи из темницы душу мою, // исповедатися имени Твоему.

Животворящему Твоему Кресту, / непрестанно кланяющеся, Христе Боже, / тридневное Воскресение Твое славим: / тем бо обновил еси истлевшее человеческое естество, Всесильне, / и иже на Небеса восход обновил еси нам, // яко Един Благ и Человеколюбец.

2. Стих: Мене ждут праведницы, // дондеже воздаси мне.

Древа преслушания запрещение разрешил еси, Спасе, / на древе крестнем волею пригвоздився, / и во ад сошед, Сильне, / смертныя узы, яко Бог, растерзал еси. / Темже кланяемся еже из мертвых Твоему Воскресению, / радостию вопиюще: // Всесильне Господи, слава Тебе.

3. Стих: Из глубины воззвах к Тебе, Господи, // Господи, услыши глас мой.

Врата адова сокрушил еси, Господи, / и Твоею смертию смертное царство разрушил еси: / род же человеческий от истления свободил еси, / живот и нетление миру даровав, / и велию милость.

4. Стих: Да будут уши Твои // внимлюще гласу моления моего.

Приидите, воспоим людие, / Спасово тридневное востание, / иже избавихомся адовых нерешимых уз; / и нетление и жизнь вси восприяхом зовуще: / Распныйся, и Погребыйся, и Воскресый, / спаси ны Воскресением Твоим, // Едине Человеколюбче.

Триоди, глас 6-й:

5. Стих: Аще беззакония назриши, Господи, Господи, кто постоит;/ яко у Тебе очищение есть.

Создатель мо́й Госпо́дь,/ персть от земли приём мя́,/ жи-
воносным дуновением вдуши́в оживи́,/ и почте на земли
начальствующа видимыми все́ми,/ и ангелом купно-
жи́теля./ Сатана же льстивый, сосуд зми́я употреби́в,/ сне-
дию прельсти, и Божия сла́вы разлучи́,/ и преисподнейшей
смерти предаде в зéмлю:// но яко Владыка и Благоутро-
бен, па́ки воззови́.

6. Стих: Имене ради Твоего потерпех Тя, Господи, потерпе
душа моя в слово Твое,/ упова душа моя на Господа.

Одежды Боготканная совлекохся окая́нный,/ Твое Боже-
ственное повеление преслушав, Го́споди,/ советом врага, и
смоковым ли́ствием,/ и кожными ризами ныне облеко́хся;/
потом бо осужден бых хлеб трудный снести;/ терние же и
волчец мне принести,/ земля проклята бысть./ Но в последняя
лета Воплотивыйся от Девы, // воззвав мя введи паки в рай.

7. Стих: От стражи утренния до нощи, от стражи утренния,
да уповаает Израиль на Господа.

Раю всечестный, краснейшая доброто,/ Богозданное селе-
ние,/ веселие некончаемое и наслаждение,/ славо праведных,
пророков красото,/ и святых жилище,/ шумом листвий Твоих
Соделателя всех моли,/ врата отверсти ми, яже преступлением за-
творих,/ и сподобитися древа животного прияти, // и радости,
еяже прежде в Тебе насладихся.

и святителя, глас тойже:

8. Стих: Яко у Господа милость и многое у Него избавление:/
и Той избавит Израиля от всех беззаконий его.

Земля Псковская просла́вися,/ яко в малем селении
Кли́не/ от благочестиваго корене плод благокрасен про-
зябе́,/ Василий, отроча благонравное,/ святителю Вели-
кому тезоименито́е./ В сем же имени велий, яко
ца́рственный, // путь ему́ преднарече́ся.

9. Стих: Хвалите Господа вси языцы,/ похвалите Его
вси людие.

Благочестивый иерей Иоанн,/ отец твой, святителю,/ откровения дивнаго сподобися,/ егда матери его почившая во сне ему явися/ и ты, еще ты отроку сущу,/ единого от трех братьий// велика предна́рече́.

10. Стих: Яко утвердися милость Его на нас,/ и истина Господня пребывает во век.

Измлада церковь Божью возлюбив/ и благочестия возделев, свя́те,/ в духовнем вертограде/ во слове Божии,/ отеческих и благочестивых писаниих// начат поучатися.

«Слава» – **Триоди, глас 6-й:**

Седе Адам прямо рай,/ и свою наготу рыдая пла́каше:/ увы мне, прелестию лукавою увещанну бы́вшу/ и окрадену и славы удале́ну,/ увы мне, простотою на́гу,/ ныне же недоуме́нну!// Но, о раю, ктому твоя сладости не наслажду́ся;/ ктому не узрю Господа и Бога моего и Создателя:/ в землю бо по́йду,/ от неяже и взят бых,/ Милостиве Щедрый, вопию́ Ти:// помилуй мя па́дшаго.

«И ныне» – **Догматик, глас 4:**

Иже Тебе ради богоотец пророк Давид/ песненно о Тебе провозгласи́,/ величия Тебе Сотворшему,/ предста Царица одесную Тебе́,/ Ты бо Матерь, Ходатаицу Живота́ показа́,/ без отца́ из Тебе вочеловечитися благоволи́вый Бо́г,/ да Свой паки обновит образ, истле́вший страстьми́,/ и заблуждшее горохищное обрёт овча́,/ на ра́мо восприим, ко Отцу́ принесёт/ и Своему хотению/ с Небесными совокупит Си́лами,/ и спасёт, Богородице, ми́р// Христос, имеяй велию и богатую ми́лость.

НА ЛИТИИ

Стихира храма, глас 6:

Роги грешных сотрóшася,/ и луцы их сокруши́шася,/ греховною бо тьмою очи помрачѣвше,/ и, друг друга яко сопротивна зря́ще,/ оружием немилостивно себе уязвля́ху,/ народи же, видевше помощь Твою, Влады́чице,/ на сопротивныя устремѣ́шася, // Тебе на по́мощь призыва́юще.

И стихиры Триоди, глас 5-й:

Увы мне, Адам рыданием возопѣ́,/ яко змий и жена Божественнаго дерзновения изрѣ́нуша мя;/ и райския сладости древа снѣдь отчужди́./ Увы́ мне, не терплю прочее поноше́ния;/ иногда царь сый земных всех созданий Бóжиих,/ ны́не пленник явихся от единого беззаконнаго совѣ́та;/ и иногда́ славою безсмертия облечѣ́н сый,/ умерщвления кожу, яко смертный ока́янно обношú./ Увы́ мне, кого рыданий соде́йственника сотворю́?/ Но Ты́, Человеколюбче, от земли Созда́вый мя,/ во благоутробие оболкѣ́йся, // работы вражия свободѣ́, и спасѣ́ мя.

По́прище добродетелей отвѣ́рзеся,/ хотящии страдальчествовати вни́дите,/ препоя́савшеся добрым поста по́двигом:/ за́конно бо страдальчеству́ющие,/ праведно венча́ются./ И восприѣ́мше всеору́жие креста́,/ вра́гу сопроти́вимся,/ яко стену нерушимую имуще ве́ру,/ и яко щит молитву, и шлем милостыню,/ вместо меча пост, иже отсекает от сердца всю злобу. // Творя́й сия, истинный примет венец от Всецаря Христа в день судный.

«Слава» – святителя, глас 8:

Пу́ть девства, нищеты, своей воли отсече́ния/ избра́л еси, блаженне, иноческое постриже́ние приѣ́м,/ в немже именем Тѣ́хон нарече́н бѣ, // да путем благочестия святителя Задонскаго шѣ́ствуеши.

«И ныне» – Триоди, глас 6-й:

Солнце лучи скры́,/ луна со звездами в кровь преложис́я,/ горы ужасошася, холми вострепеташа,/ егда рай заключис́я./ Исходя Адам рукама бия в лице, глаго́лаше:// Милостиве, помилуй мя падшаго.

НА СТИХОВНЕ

Стихиры воскресные, глас 4:

Господи, восше́д на Крест,/ прадеднюю нашу клятву потребил еси́,/ и соше́д во ад, вечныя узники свободил еси́,/ нетление даруя человеческому роду,/ сего ради поюще сла́вим// Животворящее и Спасительное Твое Воста́ние.

Стих: Господь воцарися,/ в лепоту облечеса.

Повешен на древе, Едине Сильне,/ всю тварь поколебал еси:/ положен же во гробе,/ живущия во гробех воскресил еси,/ нетление и жизнь даруя человеческому роду./ Темже поюще, славим// тридневное Твое Востание.

Стих: Ибо утверди вселенную,/ яже не подвижется.

Людие беззаконнии, Христе,/ Тебе, предавше Пилату, распяти осудиша,/ неблагодарнии о Благодетеле явившеся./ Но волею претерпел еси погребение:/ самовластно воскресл еси тридневно, яко Бог,// даруя нам безконечный живот, и велию милость.

Стих: Дому Твоему подобает святыня,/ Господи, в долготу дний.

Со слезами жены дошедша гроба, Тебе искаху,/ не обретша же, рыдающа с плачем вопиюща глаголаху:/ увы нам, Спасе наш Царю всех,/ како украден был еси;/ кое же место держит Живоносное Тело Твое?/ Ангел же к ним отвещаваше, не плачите, глаголет,/ но шедша проповедите, яко воскресе Господь,// подая нам радость, яко Един Благоутробен.

«Слава» – **святителя, глас 4:**

Земля Литовская просла́вися/ пришё́ствием твоим, бла-
же́нне,/ лю́дие же правосла́внии, в ней су́щии,/ я́ко свети́ль-
ника веры и благочестия тя прия́ша/ и в поклонении Триеди-
ному Богу тобою утверди́шася,/ святите́льский же омофор
твоей надё́жный покрóв// и защита от злых обстоя́ний тем
яви́ся.

«И ныне» – **Триоди, глас 6-й:**

Изгнан бысть Адам из рая снёдию,/ темже и сидя прямо сего
рыда́ше,/ стена умилительным гласом, и глаго́лаше:/ увы
мне, что пострадах окаянный аз:/ едину заповедь преступих
Владычню,/ и благих всяческих лишихся!/ Раю святейший,/
мене ради насажденный быв,/ и Евы ради затворенный,/ мо-
ли тебе Сотворшаго, и мене Создавшаго,/ яко да Твоих цве-
тов исполнюся./ Темже и к нему Спас:/ Моему созданию не
хощу погибнути,/ но хощу сему спастися,/ и в познание ис-
тины приити,// яко грядущаго ко Мне не изгоняю вон.

По Трисвятом – «Богородице Дево...» (трижды).

НА УТРЕНЕ НА «БОГ ГОСПОДЬ»

Тропарь воскресный, глас 4

Светлую Воскресения прóповедь/ от Ангела уведевша Гос-
подни учени́цы/ и прадеднее осуждение отве́ргша,/ апóстолом хваля́щаяся глаго́лаху:/ испрове́ржеся сме́рть,/
воскре́се Христо́с Бо́г,// даруяй миру велию ми́лость. **Два-**
жды.

«Слава» – **тропарь святителя, глас 1:**

Апóстольских преданий ревни́теля/ и Христовы Церкви пас-
тыря до́браго,/ ду́шу свою за овцы положи́вшаго,/ жре́бием
Божиим избра́ннаго/ Всеросси́йскаго Патриарха Тихона
восхва́лим/ и к нему с верою и упова́нием возопи́м:/ пред-
ста́тельством святительским ко Го́споду/ Церковь Русскую в
тишинé соблюди́,/ расточённая чада ея во едино ста́до собе-
ри́,/ отступившия от правыя веры к пока́нию обрати́,/ стра-
ну́ нашу от междоусобныя бра́ни сохрани́// и мир Божий
лю́дем испроси́.

«И ныне» – **Богородичен воскресный:**

Гаври́лу вещавшу Тебе, Дево, ра́дуйся, / со гласом воплощашеся всех Влады́ка, / в Тебе́, святем киво́те, / якоже рече пра́ведный Дави́д; / яви́лася еси ширшая Небе́с, / поносивши Зижди́теля Твоего́. / Слава Всельшемуся в Тя́, / слава Прошедшему из Тебе́, // слава Свободившему нас Рожде́ством Твои́м.

Полиелей. К двум полиелейным псалмам присоединяется псалом 136-й: «На река́х Вавило́нских...». Величание святы́теля и избра́нный псалом. «Ангельский собор.

Степенны и прокимен – гласа.

«Воскресение Христово виде́ше...». По 50-м псалме: «Слава» – Триоди, глас 8-й: «Покая́ния отве́рзи ми двéри...»,

Каноны: воскресный со ирмосом на 4 (ирмосы единожды), Богородицы (Октоиха) на 2, Триоди на 4 и святы́теля на 4.

Канон воскресный, глас 4:

Песнь 1:

Моря чермную пучи́ну / невлажными стопа́ми / древний пешествовав Изра́иль, / крестообразныма Моисеовыма рука́ма // Амаликову силу в пусты́ни победи́л е́сть.

Катавасия Триоди, глас 6:

Катавасия 1: Я́ко по суху пешествовав Израиль, по бездне стопами, / гонителя́ фараона видя́ потопляема, // Богу победную́ песнь по́йм, вопия́ше.

Песнь 3:

Веселится о Тебе Церковь Твоя, Христе, зову́щи: / Ты́ моя крепость, Го́споди, // и прибе́жище, и утвержде́ние.

Катавасия 3: Несть Свят, якоже Ты, Господи Бо́же мой, / вознесый рог верных Твоих, Бла́же, // и утвердивый нас на камени испове́даний Твоего́.

Кондак святителя, глас 2:

Тíхостию нра́ва украше́н,/ кротость и милосердие кающимся явля́й,/ во испове́дании Православныя веры и любви ко Го́споду/ тверд и непреклонен пребы́л еси,/ святы́телю Христов Тíхоне./ Моли́ся о нас, да не разлучимся от любви Бо́жия,// я́же о Христе Иисусе, Господе на́шем.

Песнь 4:

Вознесена Ты видевши Це́рковь на Кресте́,/ Солнце Пра́ведное,/ ста́ в чи́не своём,/ достойно взыва́ющи:// слава си́ле Твоей, Го́споди.

Катавасия 4: Христос моя сила, Бо́г и Госпо́дь,/ честная Це́рковь Боголепно поет взыва́ющи,// от смысла чиста о Го́споде пра́зднующи.

Песнь 5:

Ты, Господи мой, Свет/ в мир пришёл еси,/ Свет Святы́й, обраща́й из мрачна неведения// ве́рою воспева́ющия Тя́.

Катавасия 5: Божиим/ светом Твоим, Бла́же,/ утренюющих Ти души любовью озари, молю́ся,/ Ты ведети, Слове Божий, Истиннаго Бо́га,// от мрака грехо́внаго взыва́юща.

Песнь 6:

Пожру Ти со гласом хваления, Го́споди,/ Це́рковь вопиёт Ти,/ от бесовския крове очи́щися/ ради милости от ре́бр Твои́х// исте́кшею Кро́вию.

Катавасия 6: Житейское море воздвигаемое зря напастей бу́рею,/ к тихому пристанищу Твоему притек вопию́ Ти:// возведи от тли живо́т мой, Многоми́лостиве.

Кондак Триоди, глас 6:

Премудрости Наставниче, смысла Подáтелю,/ немудрых Наказателю, и нищих Защи́тителю,/ утверди, вразуми сердце мое, Влады́ко!/ Ты даждь ми слово, Отчее Сло́во,/ се бо устне мой не возбраню́,/ во еже зва́ти Тебе́:// Милостиве, поми́луй мя па́дшаго.

Песнь 7:

В печи Авраамстии отроцы персидстей, / любовьию благочестия паче, / нежели пламенем, опаляеми, взыва́ху: // благословен еси в храме сла́вы Твоея, Го́споди.

Катавасия 7: Росодательну убо пещь / содела Ангел / преподобным о́троком, / халдеи же опаляющее / веление Бо́жие, мучителя увеща вопи́ти: // благословен еси Бо́же оте́ц наших.

Песнь 8:

Руце распротёр Дани́ил, / львов зияния в ро́ве затче́, / огненную же силу угаси́ша, / добродетелию препоя́савшися, / благочестия рачители, отроцы, взыва́юще: // благословите, вся дела Госпо́дня, Го́спода.

Катавасия 8: Из пламене преподобным росу источи́л еси, / и праведнаго жертву водою попали́л еси; / вся бо твориши, Христе, токмо еже хотети, // Тя превозно́сим во вся ве́ки.

Песнь Пресвято́й Богоро́дицы:

Вели́чит душа́ Моя́ Го́спода, / и возра́довася дух Мой о Бо́зе Спа́се Моём.

Честне́йшую Херувим / и Сла́внейшую без сравне́ния Серафим, / без ислéния Бо́га Сло́ва ро́ждшую, / су́щую Богоро́дицу, Тя велича́ем.

Яко призре́ на смире́ние рабы́ Своея́, / се бо от ны́не ублажа́т Мя вси ро́ди. **Честне́йшую...**

Яко сотвори́ Мне вели́чие Си́льный, / и свято́ Имя Его́, и ми́лость Его́ в ро́ды родо́в боя́щимся Его́. **Честне́йшую...**

Сотвори́ держа́ву мы́шцею Своёю, / расточи́ го́рдых мы́слию се́рдца их. **Честне́йшую...**

Низложи́ си́льные со престо́л, и вознесе́ смире́нные; / а́лчущия испо́лни благ, и богатя́щиеся отпусти́ тщи. **Честне́йшую...**

Восприя́т Изра́иля о́трока Своего́, помяну́ти ми́лости, / я́коже глаго́ла ко отце́м нашим, Авра́му и се́мени его́, да́же до ве́ка. **Честне́йшую...**

Песнь 9:

Камень нерукоусечный/ от несекомыя горы Тебе, Дёво,/ краеугольный отсечёся,/ Христос, совокупивый разстоящаяся естества.// Тем веселящися Тя, Богородице, величаём.

Катавасия 9: Бога/ человеком невозможно видети,/ на Негоже не смеют чини Ангельстии взирати;/ Тобою же, Всечистая, явися человеком/ Слово воплощено, Егоже величающе,// с небесными вои Тя ублажаем.

По 9-й песни – «Свят Господь Бог наш».

НА ХВАЛИТЕХ

Стихиры воскресные, глас 4:

1. Стих: Сотворити в них суд написан:/ слава сия будет всем преподобным Его́.

Крест претерпёвый и смёрть,/ и воскресый из мёртвых,/ Всесильне Господи,// славим Твое Воскресение.

2. Стих: Хвалите Бога во святых Его,/ хвалите Его в утверждении силы Его́.

Крестом Твоим, Христе,/ от древняя клятвы свободил еси нас,/ и смёртию Твоею естество наше мучащаго диавола упразднил еси:/ востанием же Твоим радости вся исполнил еси./ Темже вопиём Ти:// воскресый из мертвых, Господи, слава Тебе.

3. Стих: Хвалите Его на силах Его,/ хвалите Его по множеству величества Его.

Твоим Крестом, Христе Спасе,/ настави нас на истину Твою,/ и избави нас от сетей вражиих,/ воскресый из мертвых,/ возстави ны падшыяся грехом,/ простер руку Твою, Человеколюбче Господи,// молитвами святых Твоих.

4. Стих: Хвалите Его во гласе трубнем,/ хвалите Его во псалтири и гуслех.

Отеческих Твоих недр не разлучився,/ Единородный Слове Божий,/ пришёл еси на землю за человеколюбие,/ Человек быв непреложен,/ и крест и смерть претерпел еси плотию,/ безстрастный Божеством: воскрес же из мёртвых,/ бессмертие подал еси роду человеческому, // яко Един Всесíлен.

и святителя, глас 4:

5. Стих: Хвалите Его в тимпане и лице,/ хвалите Его во струнах и органе.

Вере в людех оскудевшей,/ любви истощившейся,/ надежди изсякнувшей, попусти́ Господь/ мор жесток, болезнь и глад на люди отечества нашего./ Ты же, святителю,/ святыни Божия от поругания неверных защищая,/ о страждущих болезновал еси/ и к милосердию и жертве посильней от щедрот своих// всероссийскую паству призывал еси.

6. Стих: Хвалите Его в кимвалех доброголасных, хвалите Его в кимвалех восклицания./ Всякое дыхание да хвалит Господа.

Словеса премудра, о еже не леты, но деяньми благими/ полнота жития человеческого пред Богом измеряется,/ на тебе исполнишася, святителю./ Темже, душу добродетельми обогащенну имея,/ в Небесныя обители вселился еси, // идеже молишися о нас присно.

7. Стих: Уста моя возглаголют премудрость, // и поучение сердца моего разум.

Внимайте убо себе, людие российстии!/ Пробави бо Господь ныне милость Свою нам:/ потоцы крове мученик изсякоша,/ пленения от власти безбожных свободихомся,/ попраннии храмы Божии возставляются./ Бежим всемерно приражения греховнаго,/ да не паки гнев Божий наведём на ся// и не будут нам последняя горша первых.

Глас 8:

8. Стих: Благовестих правду// в церкви велицей.

Кровьми́ святых мученик/ Церковь Христова древле утвердися,/ такожде и во дни твоя, святителю Тихоне,/ во отечестве нашем, яко потоцы воднии,/ кровь святых мученик пролияся,/ обаче смотрением Божиим/ сия семя явися,// из негоже прозябе благосеннолиственное древо Руси Православныя.

Глас 6:

9. Стих: «Воскресни́, Го́споди Бо́же мой, да вознесётся рука́ Твоя́, / не забуди убо́гих Твои́х до конца́»,

Адам из рая отгонится,/ пици причастився, яко преслушник;/ Моисей Боговидец бысть,/ постом очи душевныя очистив./ Темже рая жителие быти возжелевше,/ изменимся от неполезныя пици,/ и Бога зрети желаяще,/ Моисейскую четверицу десятиц постимся,/ молитвою и молением чисто терпяще;/ утолим душевныя страсти,/ отженем плотския сласти,/ легцы к горнему шествию преидем,/ идеже ангельстии лица немолчными гласы Нераздельную воспевают Троицу,/ зрети недоуменную доброту и Владычню./ Тамо сподоби нас, Сыне Божий Жизнодавче/ на Тя надеющихся,/ ликовати со ангельскими воинствы,/ рождшия Тя Матере, Христе, молитвами, // и апостол, и мученик, и преподобных.

«Слава» – Триоди, глас тот же:

Приспе время, духовных подвигов начало,/ на демоны победа,/ всеоружное воздержание,/ ангельское благолепие,/ к Богу дерзновение:/ тем бо Моисей бысть Зиждителю собеседник,/ и глас невидимо в слухи прият./ Господи, тем сподоби и нас/ поклониться Твоим страстем, // и святому воскресению, яко Человеколюбец.

«И ныне» – «Преблагословенна еси...».

Великое славословие. По Трисвятом – тропарь воскресный:
«Воскрес из гроба...».

Перед 1-м часом на «Слава, и ныне» – стихира евангельская 4-я.

ПО ВХОДЕ – ТРОПАРИ И КОНДАКИ:

В храме Господском – тропарь воскресный, тропарь святителя. «Слава» – кондак святителя, «И ныне» – кондак Триоди.

В ХРАМЕ БОГОРОДИЦЫ

Тропарь воскресный:

Светлую Воскресения проповедь/ от Ангела уведевша Господни ученицы/ и прадеднее осуждение отвергша,/ апостолом хвалящаяся глаголаху:/ испровержесе смерть,/ воскресе Христос Бог, // даруй миру велию милость.

Тропарь храма, глас 4:

Яко необоримую стену и источник чудес/ стяжавше Тя раби Твои, Богородице пречистая,/ сопротивных ополчения низлагаем./ Темже молим Тя:// мир граду Твоему даруй и душам нашим велию милость.

тропарь святителя, глас 1:

Апостольских преданий ревнителя/ и Христовы Церкви пастыря добраго,/ душу свою за овцы положившаго,/ жребием Божиим избраннаго/ Всероссийскаго Патриарха Тихона восхвалим/ и к нему с верою и упованием возопиим:/ предстательством святительским ко Господу/ Церковь Русскую в тишине соблюди,/ расточенная чада ея во едино стадо собери,/ отступившия от правыя веры к покаянию обрати,/ страну нашу от междоусобныя брани сохрани// и мир Божий людем испроси.

Кондак Триоди, глас 6:

Премудрости Наставниче, смысла Подателю,/ немудрых Наказателю, и нищих Защителю,/ утверди, вразуми сердце мое, Владыко!/ Ты даждь ми слово, Отчее Слово,/ се бо устне мой не возбраню,/ во еже звати Тебе:// Милостиве, помилуй мя падшаго.

«Слава» – кондак святителя, глас 2:

Тíхостию нра́ва украше́н,/ кротость и милосердие кающимся
явля́й,/ во испове́дании Православныя веры и любви ко
Го́споду/ тверд и непреклонен пребы́л еси,/ святы́телю Хри-
стов Тíхоне./ Моли́ся о нас, да не разлучимся от любви
Бо́жия,// я́же о Христе Иисусе, Господе на́шем.

«И ныне» – кондак храма, глас 4:

Честнаго образа Твоего знамение прáзднующе/ лю́дие Твои,
Богороди́тельнице,/ и́мже дивную победу на сопротивныя
граду Твоему дарова́ла еси́./ Те́мже Тебе верою взыва́ем://
раду́йся, Дево, христиа́н похвало́.

**В храме святого – тропарь воскресный, тропарь храма, тро-
парь святителя; кондак храма. «Слава» – кондак святителя,
«И ныне» – кондак Триоди.**

**Прокимен и аллилуиарий – Недели сыропустной глас 8: По-
молитесь и воздадите Господеву Богу нашему.**

И святителя:

**Причастен – воскресный: «Хвалите Го́спода с Небес...», и
святителя: «В па́мять ве́чную...».**